

## Ebe onuzi-eva ni iPita O keke

<sup>1</sup> Mhemhe iSamọ iPita ni mhi khi oghumha ali aghiusomhi na kee oyi iJesu iKirisiti, mhi keke ebe ona ghi eni e mhọli irudunga nabi oyi anye ni o mu ẹloe, ni a rote angeli onete oyi Eshinegba ali iJesu iKirisiti Omiepfuese ro na we.

<sup>2</sup> Okhale ali opfomhe o ka khi oye rote ilese ni a lese Eshinegba ali iJesu Onomhue oyawa.

### *Ulumhi ali uzemhi oyi Eshinegba*

<sup>3</sup> Itoto oyi Eshinegba o she ri emhikpa ni o ri awa ya ke la agbo irudunga na awa, irari khi awa lese oni o ri ufumhi ali onete oyoli ti awa mama egbe.

<sup>4</sup> Eni ekpabo eniemhi ena o ro rue isomhopfa ni e mu ẹloe ni o shobo na awa. Ini a bhale ya e khi irari eni isomhopfa ena awa me asha na pfue epfua ni o la oghumhe emhi agbo, ni awa mhọli okemhi shi agbo oyi Eshinegba.

<sup>5</sup> Irarigho, rosheka ri ingeli enete ma irudunga oye, gbo ri ilese ma ingeli enete. <sup>6</sup> Ri igue-regbekia she egbe ma ilese, ri iregbemie ma igue-regbekia shi egbe, ri angeli irudunga ma iregbemie, <sup>7</sup> ri isomhelemhi-inyoghwo ma angeli irudunga, ri inono ma isomhelemhi inyoghwo. <sup>8</sup> Irari khi ini u mhọli eni ingeli enana egbegbo, e ya re ke zaza, wa gbe akanya elemhi ilese ni u lese Onomhue iJesu iKirisiti. <sup>9</sup> Ama oni o da mhọli eni ingeli ena ne, o ya me eke nuata, eri o ze alo, o she yele-a khi

Ɛshinegba ọ she kpẹ khueşẹ luẹ olamhe enedio-a pfuase.

<sup>10</sup> Irarigho, inyoghuo-mhe, roşheka ni uzemhi ali ulumhi oye o migha egbegbo. Ini u wa ligho, waa ya tigbe do owe eke-a wekhi eri u ya de. <sup>11</sup> Eghẹghe agho Ɛshinegba ọ ya khueghie ode Omheşẹ oyi Onomhue-a ne lo. Ikhi Onomhue na agboagbo Omiepfuese iJesu iKirisiti oyawa.

*A ri esọ shi emini Ebe-no-pfuase o ngme*

<sup>12</sup> Mhi ya ke yele e le eni ingme ena nya eghẹghe kpa. Ini a ririe kpẹ leşẹ we, ni a migha gba elemhi igesikia ni a mholi ena. <sup>13</sup> Mhi leşẹ khi o ti ni mhi yele e eni ingme ena nya le, ini mhi da kie la agbo.

<sup>14</sup> IJesu iKirisiti Onomhue oyawa ọ she ro li khaşẹ mhe khi ogbele eyemhe ea ke bu, khi mhi kele ya ghua. <sup>15</sup> Mhi ya roşheka ri ingme ena nya shi e odalo ni a ke sato ọ, ini mhi so ukhokho gbe.

*Eni e ri ukpeloe me ufumhi oyi iKirisiti*

<sup>16</sup> Oa khi okhe egbholi anye regbenga gue ingme inyenegbe bhale oniemi oyi iJesu Onomhue ye e. Alo eyanye anye ro me ufumhi oyoli. <sup>17</sup> Anye la agho ni Ɛshinegba ita ọ ro ri ufumhi ali ekpe na li, ni uruli oyi Ɛshinegba ọ ro rote otughunu ni o ge nyanyanya ngme, ni oo, "Omimhe ni mhi nono ingme oyoli na, ọ ma ghole mhe." <sup>18</sup> Eri anye so khi oni ungmehi o rote idane ngme tiemhile, abi anye ro nu oli la ukhomhi ute no pfuase.\*

<sup>19</sup> Igho anye li mholi iregbenga shi usomhi ni emekeguele e guele, khi egbegbo lo. O ma a ti e egbe ini a ri esọ shi oni ungmehi, itobo khi eri

\* **1:18** Li ze iMat 17.1-5; iMak 9.2-7; iLuk 9.28-35

o li abi ákpá ni o la alo ebili ẹ ẹ nyagha, ramhi ni ogbe o rọ maghiẹ alo-a, ni imekẹ oyi ukpẹtata na obili-atso o rọ ẹ shi udu o yẹ. <sup>20</sup> Ọzukhomhi oni ungmemhi khi, a lẹsẹ khi ungmemhi amẹguele okhọghuo ọa rọte ilẹsẹ oyi ọmekẹguele ọkhọghuo bhale. <sup>21</sup> Irari khi ungmemhi amẹguele okhọghuo ọa ri imelemhi oyi ọgbọ bhale ghue, ama Ayemhẹ-nọ-pfuasẹ o la ẹgbọ egbe gbe akanya rẹwẹ gue usomhi oyi Ẹshinẹgba le.

## 2

### *Ena Osẹsẹ ẹgbhọli ali epfua oyẹwẹ*

<sup>1</sup> Abi emekẹguele eyi ẹgbhọli e ke li la iteva eyi ẹgbọ iZireni, ighọ esesẹ ẹgbhọli e ya li la ẹ iteva. E ya tsua osesẹ ẹgbhọli ni ọọ yese ẹgbọ-a lasele ke sesẹ ẹgbọ, e ga kie Ọnọmhue ni ọ dẹ wẹ, e ya ri epfua ni o keleş ghi egbewẹ. <sup>2</sup> Ighọ ebubu ẹ e li ya deba ode omama eyi itsebọ eyewẹ, e ri omama shishi oni ode igesikia oyi iKirisiti-a. <sup>3</sup> E ya ri emhi ituegbe rue okhẹ ẹgbhọli lasele gueye ẹ, ni e rọ mẹ asha di ẹ mie ikpaghọ. Ẹshinẹgba ọ she sọ wẹ ẹzọ se agbọagbọ, epfua oyewẹ o migha khẹ wẹ ode.

<sup>4</sup> Irari khi ini Ẹshinẹgba ọa kesẹ igeni le abi e rọ lamhẹ deba Ẹshinẹgba, ama ọ ku wẹ lo ilimhi irierie, ọ ri iweghẹ ẹ wẹ abọ pfino kulo alo ebili migha khẹ ogbele iso-ẹzọ. <sup>5</sup> Ini Ẹshinẹgba ọa pfuse agbọ onodio, ama ọ ri ochikpho oniemi pfuse oni agbọ olamhẹ-a, sẹ ni iNoa ni ọọ tse abọ iguẹ ngeli ali apfoli oshilua.\* <sup>6</sup> Ini Ẹshinẹgba ọ pfa ẹzọ mu iSodomu ali iGomora, khi ọ ri erali tose wẹ ni e de emue-a, ni ọ rẹwẹ riẹle irokhokhọ abi o ya li ẹgbọ

\* 2:5 Li zẹ Igbae 6.1–7.24

ni ẹa mhọli Ẹshinẹgba egbe,† 7 ni ọ rọ pfuese iLọti, ọmọse ni ọ guẹ ngeli, ni ẹgbọ ena umhasuọ-esọ e ri ingeli ebe nase ayemhe.‡ 8 Eri oni ọmọse ọna ipfuase ọnana ọ viẹ oya elemhi ayemhe oyọli ẹghẹghẹ kpa shi ingeli ọkhọlọ ni ọọ mẹ ali ni ọọ gbolo suọ. 9 Ini o khi ighọ, Ọnọmhue ọ lese abi ọ liẹ tsumhi ẹgbọ eyọli elemhi imhesẹbino, ali ọ gbo li lese abi ọ li ya pfi ẹgbọ ọkhọlọ lo anasemhe ramhi ogbele isọ ẹzọ. 10 Tete ẹgbọ ni e deba ọghuemhe idiegbe oyewe ni e ri ukpeloe gbe omhesẹ oyi Ẹshinẹgba.

E mhọli igbedu obe ali ititiegbe. Ulishi ọa ya mu we ni e rọ ri unu ghi igeni rọ yese we-a. 11 Ama abotseku khia khi eni igeni ena e mhọli ekpabọ dọse eni esese ẹgbhọli ena, ẹa ya yese we-a khase Ọnọmhue. 12 Eri eni ẹgbọ ena ẹẹ pfi unu-a shi emini ẹa lese udi ọli. Eri e li abi elamhako ni ẹa mhọli ẹgbhali ni a bia, ni a mu ẹ gbolo le tse. Ighọ e li ya pfua abi elamhako. 13 Opfuse a rọ ya fali we ota shi ode opfuse ni weweghuo e be na egbewe. Idobie ẹle ọguota gboo, ẹẹ bino khi o khi agbo ilili, ni o ya khuese idiegbe oyewe. Ẹgbọ ebe e khi itobo khi ini e nu ẹ le eminale inono kugbe eghọ, eri e kiele ẹ ngeli angeli efiala. 14 Alo efiala eyi okia, e ze shi ukhomhi, ikpotso ni e ya yemhe shi we ọ, e kia bino alo. Okiamhi olamhe ni ọọ gbe we ọa tigbe ẹ mhọli ukpese. Ẹgbọ ni udu oyewe ọa sheshe ẹẹ di kulo igha olamhe. E she wena emhi ituegbe shi udu. Elemhi itse eyi Ẹshinẹgba e la kia. 15 E she da egbegbo ode lase, e wase ode oyewe-a. E she deba ode oyi iBelamu omi iBeọ vu ni ọ mhọli ukpokọ shi ukpagho ni ọ ya mie shi onobe ilili. 16 Ni akphere

† 2:6 Li ze Igbae 19.24    ‡ 2:7 Li ze Igbae 19.1-16

ọ dese shi angeli olamhẹ. Akphẹrẹ ni o khia khi ọa kpẹ mhọli ungmehi ọgbọ shi unu, ni ọ ri uruli ọgbọ nu iBelamu ngme shi angeli ujili. §

<sup>17</sup> Eri ẹgbọ ena e li abi okẹ ni o khakha-a, ali uza ni o bi abi amẹ ni akpekpeli o pfiolo irarogbe kua. Ẹshinẹgba ọ she riẹlẹ ilimhi iriẹriẹ shi ekẹ ẹ khẹ wẹ ni e la mẹ osoli. <sup>18</sup> Eri ẹẹ ngme ingmemhi itono obọ udu, ali ingmemhi ni e viọlọ, rọ rẹ ẹgbọ sato ọghuẹmhẹ idiegbe oyẹwẹ, ni e ba di wẹ nyenẹ egbe je olamhẹ. Ikhi ẹgbọ ni e lẹsẹ rọte ifuabọ eyi ẹgbọ ni e la agbọ ẹgbhọli pfue. <sup>19</sup> E shobọ ẹpfua na wẹ, ama wẹwẹ ni e shi oni obọ onana, e khi ighumha angeli ẹpfua. Irari khi oghumha ọgbọ ọ khi shi emini o da mhẹsẹ na ayẹmhẹ oyọli. <sup>20</sup> Irari khi, ini ẹgbọ e she da rọte oyese ni o la agbọ pfue ne itobọ khi e lẹsẹ iJesu iKirisiti Onomhūẹ, ni e rọ gbo ri egbewẹ na emhi agbọ gẹnọ ne, ikpukhokho oyẹwẹ o kẹ khọlọ dọsẹ igbaekẹle oyẹwẹ. <sup>21</sup> O kha tinẹ ini ẹa bie kpẹ lẹsẹ ode ipfuasẹ oyi Ẹshinẹgba lọ, khi e lẹsẹ ọli se, e tigbe sọ ukhokho gbe ode ipfuasẹ oyi Ẹshinẹgba ni a rọ na wẹ. <sup>22</sup> Emini ọ li wẹ o rọkhasẹ khi ekpita ona khi igesikia lọ, ni ọọ,

“Áwá ọ mu egbe nyenẹ  
gbo ya le ekpa  
ni ọ kpa shi ekẹ.

Agulu ni a kpe khuẹsẹ-a se,  
ọ gbo mu egbe nyenẹ  
je igbolọ ya pfue.”\*

---

§ 2:16 Li zẹ iNọba 22.4-35 \* 2:22 Li zẹ Ekpi 26.11

### 3

#### *Ọnọmhuẹ ọ nyenẹ egbe ẹ bhale*

<sup>1</sup> Emọlemhẹ, ebe onuzi-eva ni mhi kẹkẹ ẹ ghi ẹ na, eri mhi ri ebe eva ena ya guise ẹ le ali ni a rọ mhọli isamhi eni e te ode. <sup>2</sup> A sato ingmemhi ni emekẹguele ni e pfuase e ngme ni o she teşẹ, ali omhese ni Ọnọmhuẹ Ọmiepfuese ọyawa ọ mhese rọte obọ ighiusomhi na kẹẹ eyawa.

<sup>3</sup> Onodode, a leşẹ khi ogbeleş ni e kpukhokho, ẹgbọ ni e ri ungmehi oyi Ẹshinẹgba a li egia e ya lasele. Ẹ ẹ li egia ẹ ẹ riele ọghuẹmhe idiegbe oyewe.\*

<sup>4</sup> E ya ke liẹ, “Ighẹ ibhale ni ọ shobọ khi lọli ya bhale mena? Abi ititawa e te ghuloa, emhikpa e kiele ẹ je odalo abi e li rọte igbaekẹle agbọ la ọ.” <sup>5</sup> Eri e famhi rọli shi iẹ-esọ-a, khi rọte ungmehi oyi Ẹshinẹgba a te ma idane, ni a rọ gbo rọte amẹ ri amẹ ma eke agbọ.† <sup>6</sup> Ama, eni amẹ ena a gbo rọ ri ochikpho pfuse ẹgbọ na agbọ onodiọ-a.‡ <sup>7</sup> Ama agbọ ali idane ni e kie laọ ogbe-namo, Eghiele oyi Ẹshinẹgba a rọ rewe migha rewe ẹ khe ofuse oyi erali. Eri a ze we obọ ọ khe ogbeleş iguezo ni a rọ ya pfuse ẹgbọ ọkhọlo-a.

<sup>8</sup> Emọlemhẹ, a khi yele emhi oghuo-a khi, eri ogbeleşhuo o li abi ogbeleş agbeleş, ogbeleş agbeleş o li abi ogbeleşhuo ukpeloe oyi Ẹshinẹgba.§\* <sup>9</sup> Ọa khi eri Ẹshinẹgba ọ ti egbe ẹ je ukhokho shi emini ọ rọ shobọ, abi ẹgbọ eghuo e liẹ sa khi ini emhi ọọ ti eke eri o wu eke-a eghọ. Eri ọ mema mhọli irabọmudu

\* **3:3** Li ze iJu 18 † **3:5** Li ze Igbae 1.6-9 ‡ **3:6** Li ze Igbae 7.11 § **3:8** Emini a ri onana ngme khi Ẹshinẹgba ọa deba eghẹghe gbe akanya. \* **3:8** Li ze Iwolo 90.4

na ẹ, itobọ khi ọa nono ni ọgbọkhoghuo ọ pfua, ama ni ọgbọkpa ọ te agbọ olamhẹ mu nyenẹ.

<sup>10</sup> Ama eri ogbele oyi Onomhue o ya bhale abi ibhale oyi oghiato. Oni ogbele, eri idane o ya ri okeke oniemi kele-a udemhija. Erali oniemi o daghie emini e la idane nya kua. Eke ali emhikpa ni e laọ e kala-a.†

<sup>11</sup> Aborokhia khi a ya lina pfuse emhi nya ena, uwali egbo enabise a kha ke fe khi? A kha ke la agbo ipfuse ali agbo Eshinegba, <sup>12</sup> abi a li ri eloe shi eke e khe ogbele oyi Eshinegba, ni awa ke riele emini o ya roli bhale pia, ali ogbele ni a ya ri erali pfuse idane-a erali oniemi o daghie emini e la idane-a nyaa. <sup>13</sup> Ama emini Eshinegba o ro shobo, awa migha a khe, ikhi iloghie ali eke agbo onogbo, ni o khi apfe igue-ngeli.‡

<sup>14</sup> Irarigho, ee emole mhe, abi a li ri eloe shi eke e khe oni ogbele ena, a ze ni a bhale ya e e shi ingeli ni ea mholi ichimhi ali umhaguekia, ali a la opfomhe. <sup>15</sup> Ri oli shi udu khi irabomudu ni Onomhue o mholi na awa, khi, ni o ba ri egheghe na awa mholi imiepfuese lo, ezeze abi inyoghua awa ipolu o kpe li keke oli shi ebe ghi e abi Eshinegba o li ri oni ileasingme na li. <sup>16</sup> Ina o kie lie keke oli shi ebe, ini o da a ngme eni ingmemhi ena ne. Ebe ni o keke e tsua ingme eghuo ni e lolo e munu irolo-ogbo-eso, ni egbo ni ea mholi ilese ali igesikia e kholo e mano, abi e lie khi ma ingmemhi elese ni e la Ebe-no-pfuse ni o ya ri epfua ghi we.

---

† **3:10** Li ze iMat 24.43; iLuk 12.39; 1 iTesa 5.2; Iro 16.15    ‡ **3:13** Li ze Aza 65.17; 66.22; Iro 21.1

<sup>17</sup> Irarigho, emọlemhe, abi a ke ro leşe onana egho, a mu egbe e ini a khi ya deba ode egholi oyi egho ena umhasuo-eso, ini a khi rote iguemigha oye e de. <sup>18</sup> Ama mena awa ke fu shi okhale ali ileşe ni awa leşe Onomhue Omiepfuese oyawa ikhi iJesu iKirisiti. Loli a ri Ufumhi a na agboagbo. Atse!



**Ebe-No-Pfuase Ishobo Onogbo**  
**New Testament in Ivbie North-Okpela-Arhe**  
**(NI:atg:Ivbie North-Okpela-Arhe)**

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

**The New Testament**

in Ivbie North-Okpela-Arhe

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 11 Nov 2022 from source files  
dated 29 Jan 2022

03be06b0-68fd-500b-b9a9-6bca4b63979a